

Inuussutissanik nersutillu nappaataannik inunnut tunillaassorsinnaasunik nakkutilliineq pillugu Inatsisartut peqqussutaat nr. 17, 28. oktober 1993-imeersoq

Kalaallit Nunaanni Peqqinnissaqarfik pillugu Inatsimmi nr. 369-imi 6. juni 1991-imeersumi § 1 tunngavigalugu aalajangersarneqarput:

Kapitali 1.

Inatsisartut peqqussutaata atuuffii.

§ 1. Inatsisartut peqqussutaanni matumani ilaatinneqarput inuussutissat, kiisalu nersutit nappaataat inunnut tunillaassorsinnaasut, perlerorneq trikinilu ilanngullugit, pillugit nakkutilliineq, akuersissutit misissuinerlu.

Imm. 2. Inatsisartut peqqussutaanni matumani ilaatinneqanngillat neqinik avammut tunisassianik nakkutilliineq aamma aalisakkat aalisakkanillu tunisassiat pitsaassusaannik nakkutilliineq.

Kapitali 2.

Oqartussat.

§ 2. Naalackersuisut qitiusumik oqartussat.

Imm. 2. Kapitalit 3, 4, 5 aamma kapitali 7, § 13, imm. 3 eqqarsaatigalugit qitiunngitsumik oqartussat Naalackersuisut aalajangersassavaat, kapitalilu 1, § 13, imm. 2 eqqarsaatigalugu kommunalbestyrelsip.

§ 3. Oqartussaaffiup ingerlanneqarnera pillugu Naalackersuisut malittarisassiussapput.

Kapitali 3.

Nakkutilliineq.

§ 4. Peqqinnissaqarfeqarfinni tamani Naalackersuisunit taamaaliornissamut piginnaatinneqartup inuussutissat nunamut eqqussorneqarnerini, tunisassiarineqarnerini, suliarineqarnerini, nioqqutigineqarnerini, uninngatillugit toqqortarineqarnerini assartorneqarnerinilu, kiisalu namminersortut pisortalluunniit nerisassiorfigisartagaanni akiliilluni, atorfeqarfeqarnermut inissinneqarsimanermulluunniit atatillugu neriffiusartuni eqqiluisaarnikkut pissutsit nakkutigissavai.

§ 5. Nakkutilliisoq kinaassutsimut uppernarsaammik takutitsinikkut eqqartuussivimmiillu taamaaliornissamut piginnaatitsissummik peqanngikkaluarluni pisortat namminersortullu pigisaannut isersinnaatitaavoq inatsisartut peqqussutaat imaluunniit inatsisartut peqqussutaat naapertorlugu malittarisassiat naapertorlugit aalajangiinernut atatillugu paasissutissanik pissarsiniarluni.

§ 6. Nakkutilliinerup qanoq akulitsigisumik pisarnissaa annertutiginissaalu kiisalu nakkutilliinermut atatillugu nalunaarusiortarnissaq pillugit Naalackersuisut malittarisassiussapput.

§ 7. Nakkutilliinnermik ingerlataqartup suliassap kapitalimi matumani taaneqartup ingerlanneqarnerani Nersutaateqarnermik Nakkutilliisoq, Veterinærinspektøri, Aalisarnermi Nakkutilliisoqarfik, Fiskerikontroli, Suliffinnillu Nakkutilliisoqarfik, Arbejdstilsyni, suliassani suliassaqaqfennut taakkununga attuumassuteqaqfiusuni suleqatigissavai.

Kapitali 4.

Peqqussutit inerteqqutillu.

§ 8. Nakkutilliinermik ingerlataqartup piginnittoq, pisorta qaqutsisorluunniit peqqusinnaavaa eqqiluisaarnikkut pissutsit naammaginangitsut piffissap erseqqinnerusumik aalajangersarneqartup, peqqussutillu suuneranut naapertuuttup, iluani aaqqiivigissagai. Taamatut peqqussuteqaqarneq allakkatigut nalunaarutigineqassaaq, allakkallu assilineri Naalackersuisunut nassiunneqarlutik.

Imm. 2. Peqqussutigineqartoq piffissaliunneqartup iluani aaqqinneqanngippat nakkutilliinermik ingerlataqartoq suliffimmik matusinissamat pisinnaatitaavoq pissutsit pineqartut aaqqinneqarnissaasa tungaanut.

§ 9. Inuussutissanik nalinginnaasumik atorineqarnermikkut tunillaassuilersinnaasorisanik nappaalalersitsisinnaasorisanilluunniit, imaluunniit toqunartoqalersitsisinnaasut, imaluunniit isikkui allannorsimasut, mikiarsimasut, mingutsinneqarsimasut, kukkusumik passunneqarnermikkut allalluunniit pissutigalugit inunnut nerisassatut isigineqarsinnaanngitsut tuniniarneqarneri tunniussunneqarneriluunniit nakkutilliinermik ingerlataqartup inerteqqutigissallugit pisussaavoq.

Kapitali 5.

Suliffeqaqfennut inuussutissanik suliarinninnissamik, uninngatillugit toqqortarinninnissamik, assartuinissamik nioqquteqaqarnissamilluunniit kissaateqaqartunut akuersissuteqaqarneq.

§ 10. Suliffeqaqfiit inuussutissanik inuutissarsiutigalugu suliarinninnissamik, uninngatillugit toqqortarinninnissamik, assartuinissamik nioqquteqaqarnissamilluunniit kissaatigisaqartut akuersissummik peqqaarsimatinnatik taamatut ingerlatsisinnaanngillat.

Imm. 2. Suliffeqaqfiit imm. 1-imi taaneqartut pillugit qinnuteqaat titartakkanik paasissutissanillu sukuumisunik ilaqartinneqartoq Naalackersuisunut nassiunneqassaaq.

Imm. 3. Qitiunngitsumik oqartussaasup tusarniaavigineqareerneratigut suliffeqaqfik Naalackersuisunit akuerineqarsinnaavoq.

Imm. 4. Akuerineqarsimanissamik piomasaaqat aalisakkanik pisanilluunniit allanik namminersortup ilaannikkuinnaq tuniniaasarnera imaluunniit piniartumit pisisartumut toqqaannartumik tuniniaaneq inerteqqummi ilaatinneqanngillat.

Imm. 5. Suliffeqaqfiit pioreersut akuersissutaagallartumillu pigisaqartut piffissap Naalackersuisunit aalajangersarneqarsimasup iluani suliffeqaqfiup ingerlaannarsinnaanissaanut qinnuteqaammik pissarsiniassapput.

§ 11. Inuussutissalerinermik suliffeqarfinnut akuersissutit pillugit Naalakkersuisut malittarisassiussapput.

Kapitali 6.

Naammagittaalliuuteqartarnek.

§ 12. §§ 8-9 tunngavigalugit nakkutilliinermik ingerlataqartup aalajangigai Naalakkersuisunut naammagittaalliuutigineqarsinnaapput.

Imm.2. Naammagittaalliuuteqarsinnaatitaapput:

- 1) aalajangiinermi pineqartoq, aamma
- 2) kinaluunniit suliassap inerneqarnerata qanoq kinguneqarneranik nammineerluni annertuumilluunniit soqutigisaqartoq.

Imm. 3. Aalajangiinerup pineqartumut ulloq nalunaarutigineqarfianiit sap. akunneri arfinillit naammagittaalliuuteqarnissamut piffissarititaapput.

Imm. 4. Naammagittaalliornek Naalakkersuisut allamik aalajangiisimatinnagit aalajangikkap atuukkunnaarallarnissaanik kinguneqarnek ajorpoq.

Kapitali 7.

Nersutit nappaataat inunnut tunillaassorsinnaasut, perlerorneq trikinillu ilanngullugit.

§ 13. Naalakkersuisut pisussaaffigaat nersutit nappaataasa inunnut tunillaassorsinnaasut nakkutiginnissaat, kiisalu tunillaassuuttoqalinnginnissaa siunertaralugu akiuussutissanik kapuinerup nakkutilliinerullu qularnaarneqarnissaa.

Imm. 2. Perlerornermut akiuussutissamik kapuisoqarnissaanik Naalakkersuisut peqqussutaata isumaginissaa, tamanna pillugu Naalakkersuisunut nalunaaruteqarnissaq kommunalbestyrelsip pisussaaffigaa.

Imm. 3. Naalakkersuisunit taamaaliornissamut piginnaatinneqartup trikinimik nakkutiginninnerup pisariaqartup ingerlanneqarnissaa kiisalu tamanna pillugu Naalakkersuisunut nalunaaruteqartoqarnissaa pisussaaffigai.

§ 14. Nersutit nappaataasa inunnut tunillaassorsinnaasut nakkutigineqarnerat, akiuussutissamik kapuisarneq, tunillaassuuttoqalinnginnissaalu siunertaralugu qanoq iliuusissat pillugit Naalakkersuisut malittarisassiussapput.

Kapitali 8.

Pineqaatissiisarneq atortuulersitsinerlu pillugit aalajangersakkat.

§ 15. Arsaarinninnermik pillaammillu akiliisitsinermik pineqaatissinneqarsinnaapput,

- 1) § 5 malillugu misissuineramik akornusersuisut.
- 2) § 8 malillugu peqqussutinik unioqqutitsisut,
- 3) § 9 malillugu inerteqqutinik unioqqutitsisut,

4) § 10-mik unioqqutitsisut.

Imm. 2. § 3, § 5, § 6, §11 aamma § 14 naapertorlugit malittarisassiani arsaarinninnernik pillaammillu akiliisitsinermik pineqaatissiissutissanik aalajangersaasoqarsinnaavoq.

Imm. 3. Aktiaateqarluni ingerlatseqatigiiffik (A/S), pinginneqatigiilluni ingerlatseqatigiiffik (Aps), piginneqatigiiffik (Amba) assigisaalluunniit unioqqutitsisuuppat ingerlatseqatigiiffik pillaammik akiliisinneqarlunilu arsaarinniffigineqarsinnaavoq. Naalagaaffik, Namminersornerullutik Oqartussat, kommuni kommunilluunniit ataatsimut ingerlatseqatigiiffiat unioqqutitsisuuppat naalagaaffik, Namminersornerullutik Oqartussat, kommuni kommunilluunniit ataatsimoorlutik ingerlatseqatigiiffiat pillaammik akiliisinneqarsinnaavoq arsaarinniffigineqarsinnaalluniluunniit.

Imm. 4. Imm. 1-3 tunngavigalugit pillaammik akiliisitsinerup arsaarinninnerullu saniatigut Kalaallit Nunaanni suliffimmik pisortanit akuerineqarsimasussamik ingerlatsisinnaatitaaneq arsaarinnissutigineqarsinnaavoq, piffissami erseqqinnerusumik aalajangikkamik sivisussusilimmi imalunniit killilerneqanngikkallartumik.

§ 16. Inatsisartut peqqussutaat atortuulersinneqarpoq 15. november 1993, tamatumunngalu peqatigitillugu inuussutissat qerititat pillugit nalunaarut nr. 162 21. april 1969-imeersoq atorunnaarsinneqarpoq.

Imm. 2. Kalaallit Nunaanni Peqqinnissaqarfik pillugu inatsit nr. 275 27. maj 1950-imeersoq inatsisikkut nr. 107-ikkut 26. april 1961-imeersukkut allanngortinneqarsimasoq tunngavigalugu nalunaarutit atortussanngortinneqarsimasut Inatsisartut peqqussutaat manna tunngavigalugu atorunnaarsinneqarnissamik malittarisassanilluunniit allanik taarserneqarnissamik tungaannut atuutissapput.

Namminersornerullutik Oqartussat, ulloq 28. oktober 1993.

Lars Emil Johansen

/

Ove Rosing Olsen